

南無本師釋迦牟尼佛



常被輕慢菩薩品第十九

爾時佛告得大勢菩薩摩訶薩。汝今當知。若善男子善女人。受持法華經者。其所得功德。如向所說。眼耳鼻舌身意清淨。得大勢。乃往古昔過無量無邊不可思議阿僧祇劫。有佛名威音王。劫名離衰。國名大成。其威音王佛。於彼世中為天人阿修羅說法。為求聲聞者。說應四諦法。度生老病死。究竟涅槃。為求辟支佛者。說應十二因緣法。為諸菩薩。因阿耨多羅三藐三菩提。說應六波羅蜜法。究竟佛慧。得大勢。是威音王佛。壽四十萬億那由他恆河沙劫。正法住世。劫數如一閻浮提微塵。像法住世。劫數如四天下微塵。其佛饒益衆生已。然後滅度。像法滅盡之後。於此國土復有佛出。亦號威音王。如是次第有二萬億佛。皆同一號。最後威音王如來既已滅度。正法滅後。於像法中。增上慢比丘有大勢力。爾時有一菩薩比丘。名常被輕慢。得大勢。以何因緣名常被輕慢。是比丘凡有所見。或比丘比丘尼。優婆塞優婆夷。皆悉禮拜讚歎。而作是言。我深敬汝等。不敢輕慢。所以者何。汝等往昔皆行菩薩道。當得作佛。而是比丘不專讀

誦經典。但行禮拜。教化乃至遠見四衆。亦復故往禮拜讚歎。而作是言。我不敢輕於汝等。汝等以前行菩薩道將來皆當作佛。四衆之中。有不信受生瞋恚心不淨者。惡口罵詈言。是無智比丘。從何所來。自言我不輕汝。而與我授記。當得作佛。我不用如是虛妄授記。如此經歷多年。常被罵詈。不生瞋恚。常作是言。汝當作佛。說是語時。衆人或以杖木瓦石而打擲之。則避走遠住。猶高聲唱言。我不敢輕於汝等。汝等皆當作佛。以其常作是語故。增上慢比丘比丘尼優婆塞優婆夷。號之為常被輕慢。是比丘臨欲終時。於虛空中。具聞威音王佛。先所說法華經二十千萬億偈。悉能受持。即得如上。六根清淨。更增壽命二百萬億那由他歲。廣為人說是法華經。於時增上慢四衆。輕賤是人。為作常被輕慢名者。見其得大神通力。樂說辯力。大善寂力。聞其所說。皆信伏隨從。除不見四衆是菩薩復化千萬億衆。令住阿耨多羅三藐三菩提。命終之後。得值二千億佛。皆號日月燈明。於其法中。說是一乘法華經。以是因緣。復值二千億佛。同號雲自在燈王。於此諸佛法中。受持讀誦。為諸四衆

說此經典故。增益法性無漏眼清淨。耳鼻舌身意根清淨。於四衆中說法。心無所畏。得大勢。是常被輕慢菩薩摩訶薩。供養如是若干諸佛。恭敬尊重讚歡。種諸善根。於後復值千萬億佛。亦於諸佛法中說是經典。功德成就。當得作佛。得大勢。於意云何。爾時常被輕慢菩薩。豈異人乎。則我身是。若我於宿世不受持讀誦此經。為他人說者。不能疾得阿耨多羅三藐三菩提。我於諸佛所。受持讀誦此經。為人說故。疾得阿耨多羅三藐三菩提。得大勢。彼時四衆比丘比丘尼。優婆塞優婆夷。未回心者以瞋恚意輕賤我故。二百億劫。常不值佛。不聞法。不見僧。千劫於阿鼻地獄。受大苦惱。畢是罪已。復遇常被輕慢菩薩。教化阿耨多羅三藐三菩提。得大勢。於汝意云何。爾時四衆常輕是菩薩者。豈異人乎。今此會中。跋陀婆羅等五百菩薩。師子月等五百比丘。尼思佛等五百優婆塞。皆於阿耨多羅三藐三菩提。不退轉者是。得大勢。當知是法華經。大饒益諸菩薩摩訶薩。能令至於阿耨多羅三藐三菩提。是故諸菩薩摩訶薩。於如來滅後。常應受持讀誦。解說書寫是經。

過去有佛	號威音王	神智無量	將導一切
天人龍神	所共供養	是佛滅後	法欲盡時
有一菩薩	名常被輕	時諸四衆	計著於法
被輕菩薩	往到其所	而語之言	我不輕汝
汝等行道	皆當作佛	諸人聞已	輕毀罵詈
被輕菩薩	能忍受之	其罪畢已	臨命終時
得聞此經	六根清淨	神通力故	增益壽命
復為諸人	廣說是經	諸著法衆	皆蒙菩薩
教化成就	令住佛道	被輕命終	值無數佛
說是經故	得無量福	漸具功德	疾成佛道
彼時被輕	則我身是	時四部衆	著法之者
聞被輕言	汝當作佛	以是因緣	值無數佛
此會菩薩	五百之衆	并及四部	清信士女
今於我前	聽法者是	我於前世	勸是諸人
聽受斯經	第一之法	開示教人	令住佛道
世世受持	如是經典	億億萬劫	至不可議
時乃得聞	是法華經	億億萬劫	至不可議

諸佛世尊	時說是經	是故行者	於佛滅後
聞如是經	勿生疑惑	應當一心	廣說此經
	世世值佛	疾成佛道	